



DEN NORSKE KYRKJA

Sveio Kyrkjelege Fellesråd

VEDTEKTER FOR GRAVPLASSANE I SVEIO KOMMUNE

(FORSKRIFT)

Jf. lov av 7.juni 1996 nr. 32 om gravplassar, kremasjon og gravferd (gravferdslova) § 21 (1)

Vedtatt av Sveio kyrkjelege fellesråd 21.11.2019

Godkjent av Bjørgvin bispedømeråd i brev datert 17.02.2020

Vedtektene trer i kraft frå 17.02.2020.

§ 1 FORVALTNING

Gravplassane i Sveio kommune er underlagt Sveio kyrkjelege fellesråd sitt administrasjons- og myndigheitsområde.

§ 2. DEFINISJONER

Gravplassforvaltning: Sveio kyrkjeleg fellesråd under utøving av forvaltningsansvaret sitt for gravplassane i Sveio kommune, jf. gravferdslova med forskrifter.

Fri grav: Grav som gravplassforvaltninga har tildelt ein avdød person frå kommunen, og som det ikkje blir betalt festeavgift for i fredingstida.

Festa grav: Grav som blir festa mot betaling av avgift.

Festa gravstad: Fleire kistegraver som er festa saman.

Urnegrav: Grav til oskeurne med plass til fire urner, jf. gravferdsforskrifta § 14. Dette gjeld ikkje § 11 *Namna minnelund*, kor det med urnegrav blir sikta til grav med plass til éi urne.

Kistegrav: Grav som stettar forskrifta sine krav til storleik for gravlegging av kister. I ei kistegrav kan det også gravleggjast urner.

Fredingstid: Tidsrom frå siste gravlegging til grava kan takast i bruk igjen til ny gravlegging.

Festetid: Tida det er avtala å feste ei grav for.

Ansvarleg for grav: Den som er ansvarleg for ei fri grav.

Festar: Den som står som part i ein festeavtale.

Anonym minnelund: Gravfelt for anonyme graver. Feltet kan ha eit felles minnesmerke utan opplysningar om kven som er gravlagt.

Namna minnelund: Gravfelt med felles minnesmerke med namn og data på dei som er gravlagde der.

§ 3. FERDSEL PÅ GRAVPLASSANE

Besøkande skal om mogeleg ferdast gåande, jf. gravferdsforskrifta § 9 (2).

Gravplassforvaltninga kan etter søknad gi løyve til å køyre ved dokumentert sjukdom/forflyttingshemming. All køyring skal skje særleg omsynsfullt.

§ 4. GRAVPLASSTILHØYRSLE

Avdøde personar i kommunen kan gravleggjast på den av gravplassane i kommunen som er ønska.

Dei har rett til fri grav så langt grava blir tilvist.

Avdøde personar frå andre kommunar kan bli gravlagt i kommunen mot at kostnadane ved gravferda og avgift som ved feste av grav blir betalt. Det vert tatt utgangspunkt i adresse registrert i Folkeregisteret.

Bjelland Gravplass, Førde Gamle gravplass, Eikeland Gamle gravplass og felt A på Nordskog gravplass kan berre nyttast til urnegraver. Unnataket er graver som ikkje er tatt i bruk og som allereie er festa til attlevande ektefelle.

§ 5. FREDNINGSTID

Fredingstid for kistegraver er 30 år.

Fredingstid for urnegraver er 30 år.

Gravplassforvaltninga kan vedta lengre fredingstid for enkelte graver.

§ 6. FESTE AV GRAV

Når kistegrav skal takast i bruk er det høve til å feste ei grav ved sida av, og etter søknad til gravplassforvaltninga; ei ekstra grav i tillegg når behovet tilseier det. Desse gravene utgjer då éin gravstad.

Ved bruk av særskilt urnegrav kan det ikkje bli festa ei grav ved sida av.

Ved feste av grav ved sida av den kistegrava som blir tatt i bruk, er festetida 10 år. Det må til ei kvar tid betalast festeavgift for den/dei festa gravene som ikkje er nytta til gravlegging. Ved Gravlegging i festa grav må ein betala festeavgift vidare.

Når festetida er ute, kan gravstaden bli festa for nye 10 år. Når det er gått 60 år etter siste gravlegging, kan festet ikkje bli fornya utan etter særleg samtykkje frå gravplassforvaltninga.

I god tid før festetida er ute skal festaren bli varsla. Er ikkje festet blitt fornya innan seks månader etter forfall, fell grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsregler eller det ligg føre særlege grunnar.

Ingen kan bli gravlagt i festa gravstad utan festaren sitt samtykkje. Dersom det ikkje er råd å hente inn samtykkje frå den ansvarlege eller festaren til bruk av festa grav, kan gravplassforvaltninga ta avgjersle om gravlegging. Når den døde sjølv er festar til grava som skal brukast, har den personen som skal syta for gravferda (jf. § 9 i gravferdslova) og rett til å avgjera spørsmålet om bruk av den festa grava. Festar pliktar å melde adresseendring.

§ 7. GRAV OG GRAVMINNE

Ved opning av grav kan jord bli lagt på omkringliggjande graver og gravutstyr kan mellombels bli flytta. Gravplassforvaltninga sørgjer for istandsetting igjen, og vil også sjå til at grava blir planert og tilsådd med gras etter gravlegging. Montering av gravminne kan først skje etter at gravplassforvaltninga har godkjent gravminnet og merka staden der det skal stå. Det kan ikkje bli sett opp tidlegare enn 6 månader etter nedsetjing av kiste. På gravplassar/felt som er anlagt etter 2012 kan det setjast opp gravminne på kistegraver 3 månader etter gravlegging. Gravminne på urnegrav kan bli sett opp med ein gong etter urnenedsetting. Så lenge ein ventar på gravminne kan den ansvarlege for gravferda setja opp eit merke med avdøde sitt namn på grava.

På nyfesta gravstad skal gravminnet plasserast i bakkant av den grava som er tatt i bruk først, og blir ståande der for godt.

§ 8. PLANTEFELT

Framfor gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 60 cm, målt frå gravminnet sin bakkant. Det kan ikkje plantast vekstar som overstig gravminnet si høgd eller går utover plantefeltet. Det er ikkje høve til å bruke faste dekorgjenstandar som blomsterurner, lykter mv. i plantefeltet. Det er høve til å tenne stearinlys og oljelampe på grava, så lenge dette er innanfor gjeldande reglar om brannvern. Stearinlys, oljelamper og andre lause dekorgjenstandar skal fjernast etter bruk.

Det er høve til å ramme inn plantefelt med delt steinkant eller bedplate som fluktar med terrenget omkring. Bedplate og fundament for gravminne skal ikkje henge saman.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller døde materiale.

§ 9. PLANTEMATERIALE

Planter, kransar og liknande materiale som blir nytta ved gravferd eller ved pynting av grav og som endar som avfall, skal fullt ut vere kompostérbare.

§ 10. STELL AV GRAV

Den som er ansvarleg for frigrav og gravfestar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt skal såast til av den ansvarlege eller bli sådd til av gravplassforvaltninga.

Ansvarleg for grav eller festar pliktar å halde gravminnet sikra og i forsvarleg stand.

Ansvarleg for grav eller festar kan gjere avtale om at kyrkjeleg fellesråd/ andre som får løyve til det etter § 13, kan utføre planting og stell av grav (Det same gjeld og montering, sikring og vedlikehald av gravminnet). Ein slik avtale fritenk ikkje den ansvarlege eller festar frå det ansvaret dei har etter reglane som til ei kvar tid gjeld.

§ 11. NAMNA MINNELUND

Ved gravlegging i namna minnelund skal namn og data til avdøde førast på ei standard namneplate på felles minnesmerke.

Graver i namna minnelund kan bli festa på lik linje med andre graver på gravplassen.

I namna minnelund kan det bli festa ei grav attmed. Dette gjeld også urnegrav. Ved feste av grav attmed skal det betalast festeavgift frå tidspunktet då den første grava blir tatt i bruk. Ved feste av grav attmed i namna minnelund vil ikkje gravene nødvendigvis kome attmed kvarandre, men namneplatene.

Ved gravlegging i namna minnelund må det betalast for kostnader til namneplate og del av minnesmerke, planting og stell.

Gravplassforvaltninga har ansvaret for felles planting og stell i minnelunden. Det er ikkje høve til å opparbeide eige plantefelt for grav i minnelund. Det kan leggst ned blomar og tennast gravlys så lenge dette er innanfor gjeldande reglar om brannvern, på ein stad tilvist av gravplassforvaltninga.

§ 12. BÅREROM

Bårerommet på Sveio Soknehus blir disponert av kyrkjelege fellesråd, og skal berre nyttast til oppbevaring av døde i tida fram til gravferda. Ingen har tilgang utan etter løyve. Syning av den døde kan berre finne stad etter samtykke frå den som står for gravferda, og vedkjem ikkje dei tilsette.

§ 13. NÆRINGSVERKSEMD

Næringsdrivande som ønskjer å drive verksemd på gravplassen skal hente inn løyve frå gravplassforvaltninga. Løyvet kan kallast tilbake dersom vedkomande ikkje rettar seg etter dei reglane som gjeld.

Slik verksemd kan berre omfatte montering, sikring og vedlikehald av gravminne og planting og stell av graver.

Tilsette i gravferdsforvaltninga/på gravplassen kan ikkje mot betaling utføra tenester for private eller næringsdrivande. Dei kan heller ikkje engasjera seg i sal av varer eller tenester som har med gravplassen å gjera.

§ 14. ARBEID PÅ GRAVPLASSANE

Anleggs- og vedlikehaldsarbeid skal skje på kvardagar i arbeidstida (kl. 07:00-17:00) og må ikkje utførast på søndagar, heilagdagane eller offentlege høgtidsdagane. Ikkje noko arbeid på gravplassen må vere til sjenanse for seremoniar eller rituelle handlingar på gravplass eller i bygning på gravplass. Næringsdrivande kan berre køyre på gravplassen i den grad det er nødvendig for å utføra arbeidet. Slik køyring skal skje ekstra omsynsfullt.

§ 15. DISPENSASJON FRÅ VEDTEKTENE

Gravplassforvaltninga kan i særlege tilfelle og innanfor ramma av gravferdslov og gjeldande forskrifter fråvike §§ 4,7,8 og 14 i vedtektene.

Vedlegg til vedtekter for gravplassane i Sveio kommune:

REGLER OM ORDEN, ÅTFERD OG TRYGGLEIK

Opphald, ferdsel, arbeid og andre handlingar skal skje med minst mogeleg støy og ikkje verke støyande.

Gravminne kan velte. Ein må derfor vise varsemd.

Mindre barn må vere under tilsyn av vaksne.

Hundar skal førast i kort band (maks. 2 meter).

Det skal visast omsyn ved gravferder.

Avfall skal bli kjeldesortert og lagt i avfallsbeholdarar. Utstyr som vasskanner, spadar og river skal hengast tilbake på plass.

Portane til gravplassen skal ikkje stå opne.